

## L Ö G

## um festingu verðlags og kaupgjalds.

## FORSETI ÍSLANDS

*gjörir kunnugt*: Alþingi hefur fallizt á lög þessi og ég staðfest þau með samþykki mínu:

## 1. gr.

Á tímabilinu 1. sept. til 31. des. 1956 skal greiða verðlagsuppbót á kaupgjald og laun samkvæmt kaupgjaldsvisitölu 168 að viðbættum 10 stigum. Sömu verðlagsuppbót skal á þessu tímabili greiða á allar aðrar greiðslur, er fylgja kaupgjaldsvisitölu.

## 2. gr.

Við útreikning á verðgrundvelli landbúnaðarvara 1956 samkvæmt II. kafla laga nr. 94/1947, um framleiðsluráð landbúnaðarins, verðskráningu, verðmiðlun og sölu á landbúnaðarvörum o. fl., skal miða laun bónda og verkafólks hans í verðgrundvellinum við kaupgjaldsvisitölu 168 að viðbættum 10 stigum.

Verðgrundvöllur sá, sem um ræðir í 1. mgr. þessarar greinar, gildir fyrir tímabilið 1. sept. til 31. des. 1956.

## 3. gr.

Framleiðsluráð landbúnaðarins skal, er það á hausti 1956 reiknar nýtt heildsöluverð á landbúnaðarvörum og smásöluverð á vörum, sem eigi er á heildsöluverð, miða við kaupgjaldsvisitölu 168 að viðbættum 10 stigum, að því er varðar launakostnað við vinnslu og dreifingu þeirra vara.

Ákvarðanir framleiðsluráðs landbúnaðarins um smásöluálagningu á heildsöluverð landbúnaðarvara haustið 1956 skulu háðar samþykki ríkisstjórnarinnar.

## 4. gr.

Bannað er til 31. des. 1956 að hækka söluverð innanlands á öllum vörum í heildsölu og smásölu, svo og á hvers konar verðmæti og þjónustu frá því, sem var 15. ágúst 1956. Bann þetta tekur þó ekki til þeirrar verðhækkunar vöru, sem jöfnuð kann að verða með niðurgreiðslu á verði annarrar vöru samkvæmt 6. gr. laganna.

Verðgæzlustjóri hefur eftirlit með því, að ákvæði 1. mgr. þessarar greinar séu haldin.

## 5. gr.

Innflutningsskrifstofan getur veitt undanþágu frá banni því, er um ræðir í 1. mgr. 4. gr., ef hún telur verðhækkun algerlega óhjákvæmilega, enda sé hún samþykkt af ríkisstjórninni.

## 6. gr.

Á tímabilinu til desemberloka 1956 greiðir ríkisstjórnin niður, með fjárframlagi úr ríkissjóði, hækkun þá á verði einstakra landbúnaðarvara, sem leiðir af nýjum verðgrundvelli haustið 1956, þannig að smásöluverð þeirra haldist óbreytt frá því, sem var 1. ágúst 1956. Ríkisstjórnin getur þó, eftir að hafa leitað álits stjórnar Alþýðusambands Íslands og Stéttarsambands bænda, ákveðið minni niðurgreiðslu á einni vöru en sem svarar verðhækkun hennar og þá samsvarandi meiri niðurgreiðslu á annarri vöru, þannig að visitala framfærslukostnaðar haldist óbreytt frá því, sem ella væri.

Ákvæði 1. mgr. þessarar greinar taka aðeins til landbúnaðarvara, sem verðskráðar eru af framleiðsluráði landbúnaðarins.

## 7. gr.

85

Nú rís ágreiningur um það, hvort greiðsla fellur undir ákvæði 1. gr. þessara laga, eða hvort verð á vöru eða verðmæti fellur undir ákvæði 4. gr. laganna, og skal þá málinu skotið til ríkisstjórnarinnar, sem fellir í því fullnaðarúrskurð.

## 8. gr.

Fara skal með mál út af brotum gegn lögum þessum að hætti opinberra mála, og varða brot sektum 500—500 000 kr., nema þyngri refsing liggji við samkvæmt öðrum lögum.

## 9. gr.

Lög þessi öðlast þegar gildi.

*Gjört að Bessastöðum, 22. desember 1956.*

Ásgeir Ásgeirsson.

(L. S.)

*Hannibal Valdimarsson.*

## L Ö G

86

22. des.

## um útflutningssjóð o. fl.

## FORSETI ÍSLANDS

*gjörir kunnugt:* Alþingi hefur fallizt á lög þessi og ég staðfest þau með samþykki mínu:

## I. KAFLI

## 1. gr.

Stofna skal sjóð, er nefnist útflutningssjóður.

Gjöld þau, er innheimta skal samkvæmt III. kafla laga þessara, renna í sjóð þennan, svo sem fyrir er mælt í 31. gr.

Fé útflutningssjóðs skal geyma í sérstökum reikningi í seðlabankanum.

## 2. gr.

Ríkisstjórnin skipar 5 menn í stjórn útflutningssjóðs og jafnmarga til vara. Skal einn stjórnarmaður skipaður eftir tilnefningu Stéttarsambands bænda, annar eftir tilnefningu Landssambands íslenzkra útvegsmanna og þrír án tilnefningar. Sömu reglum skal fylgt um skipun varamanna. Ríkisstjórnin skipar formann sjóðsstjórnar.

Kostnað við stjórn og rekstur sjóðsins svo og annan kostnað, sem leiðir af framkvæmd laga þessara, skal greiða af fé sjóðsins.

## II. KAFLI

## 3. gr.

Fé útflutningssjóðs skal varið til að verðbæta útflutningsafurðir og styðja útflutningsatvinnuvegi landsmanna á þann hátt, er greinir í 4. til 13. gr. laga þessara.